



2021-mut llassutissatut aningaasaliissutinut Inatsisissatut siunnersuut.

(Aningaasaqarnermut, Aatsitassanut, Inatsisit Atuutsinneranut Naligiissitaanermullu Naalakkersuisoq)
(Siullermeerinninneq)

Qularitigineqarsinnaanngilaq inatsi una COVID-19 kingunerisaanik ataatsimoorullugu akiuiniarnitsinni atatillugu aningaasartuuteqarnerulernermut tunngammat. Tamanna paasinarpoq, nuannaarutigivaralu ukiuni taakkunani Naalakkersuisut akisussaassuseqarsimaneramik, inissisimaffik immikkuullarissumut politikikkut akisussaassuseqartumik ingerlatsinikkut akissaqarsinnaasimalluta.

Ungaserujussuannngitsukkulli kisianni akisussaassuseqanngippallaarujussuarnik Naalakkersuisoqarsimavugut. Eqqaasitsissutigilara kingullermi IA Aningaasaqarnermut Naalakkersuisuutitaqarallarmat qanoq inissisimasimanerluta. 2018-mut Aningaasaqarnermut inatsisissatut siunnersuut annikitsumik sinneqartoortitsisimavoq. Tamannali partii IA sinnerlugu Aningaasaqarnermut Naalakkersuisuusimasoq Raajanut Qaleralinnullu akitsuut 85,7 million koruuninik nalilimmik qaffannerasigut peqquteqartumik pivoq. Taamaattoqanngippammi Aningaasanut Inatsisissatut siunnersuut amigartoorujussuartoq saqqummiunneqarsimassagalarpoq.

Ukiup siuliani IA-miit Aningaasaqarnermut Naalakkersuisuusooq aningaasaqarnermut inatsisissatut siunnersuut piffissaq 2017-2020 tamakkerlugu 145 million koruuninik amigartootussanngorlugu saqqummiussimavaa.

Tamanna IA nunatta aningaasaqarneranut aqutsisimanerani qitiusimasoq aningaasaqarnikkut akisussaassuseqannginneruvoq. IA-miit ingerlariuseq atorneqartoq unitsinneqarsimanngitsuuppat pisut siumut takusinnaanngisatsinnut soorlu COVID-19 taava pisunut akissaqarsimanaviannngikkaluarpuq.

Inissisimaffik tassani ernumanaatigivaa Naalakkersuisuusimasut nunatta aningaasaqarnikkut isertitsissutissaanut tunngasunik aqqissuusseqqinnissanut immikkut sammisaqannginneramik takussutissaqarsimanngimmat. Inatsisartut ataatsimiinnissaat maanna pisussami Naalakkersuisut maanna suliffeerunnermi ikiorsiissutinut taarsiussassamik suliffissarsiortunut ikiorsiissutinik taasamik siunnersuuteqarnikkut taarserniarpaat. Siunnersuut tamanna nunatta aningaasaqarnera ajorseriartittussaavaa.

Naalakkersuisut aamma akiliisarnermut aqqissuusaaq llangaassivik eqqunneqarnissaata unitsinnissaanut siunnersuuteqarput. Tamanna nunatta aningaasaqarneranut ukiumut 30 million koruuninik akeqassaaq

Naalakkersuisut aamma uuliasiornermik aningaasarsiorniannngillat, misissuinerit tamarmik unitsippaat.



Allatut oqaatigalugu ima isikkoqarpoq nunatsinni Qallunaat Nunaanniit ukiumut tapiissuteqarneq isumalluutigalugu sulii inuunissarput Naalakkersuisuniit kissaatigineqartoq. Kusanartumik oqaatigissagaanni tamanna anguniagaqannginneruallaqaaq.

Taamaattumik aqqissuussinerit ilumoortunik aallarnisaanissamik Naalakkersuisut kaammattussavakka. Aqqissuusseqqinnerit ilumoortut, nunatta aningaasaqarneranut iluarseriaateqartussat. Aammattaaq Naalakkersuisut paasiniartariaqalerpaat qanoq nunatsinnut aningaasanik isaatitsiniarnerlutik, isaatitsiffiusussat assigiinngitsunut maanna naaggaareernikuullutik.

Taamatut oqaaseqarluta siunnersuut Aningaasaqarnermut Akieraartarnermullu ataatsimiitsitaliamut suliarineqaqqinnissaa innersuussutigaarput.